

## ГАЛ ТҮЙМРИЙН АЮУЛГҮЙ БАЙДЛЫГ ХАНГАХ ЖУРАМ

1. Ангийн байрлалын хог, хатсан өвсийг байнга цэвэрлэнэ. Гал түймэр унтраахад ашиглах усны эх булаг, ангийн байрлал дахь бүх зам, гарц нь галын машин явахад чөлөөтэй байвал зохино.

2. Гал түймрийн аюулгүй байдлыг хангахын тулд дараах зүйлийг хориглоно:

2.1. онцгой байдлын асуудал эрхэлсэн төрийн захиргааны байгууллагын зөвшөөрөлгүйгээр барилга байгууламжийн зураг, зохион байгуулалтыг өөрчилж ашиглах;

2.2. эвдрэл гэмтэлтэй пийшин ашиглах, гал асаахдаа шатамхай шингэн хэрэглэх, материал хэрэгсэл, эд хөрөнгийг пийшингийн дэргэд байлгах, галтай пийшинг хяналтгүй орхих, бие бүрэлдэхүүний амрах /унтах/ цагаар пийшин галлах;

2.3. байшин барилга доторх хөлдсөн ус, түгээгүүрийн болон бусад хоолой, шугамыг ил гал, бамбар, галт хөөргөөр гэсгээх;

2.4. гал түймэр унтраах анхан шатны багаж хэрэгслийг зориулалтын бусаар ашиглах;

2.5. гэмтэлтэй цахилгаан дамжуулагч, тоног төхөөрөмжийг ашиглах, гэр ахуйн цахилгаан халаагуурыг шатдаггүй материал бүхий тавиургүйгээр хэрэглэх, хуваарилах самбарын шатсан гал хамгаалагчийг зориулалтын бус төмөр утас болон бусад зүйлээр орлуулах;

2.6. цахилгаан шугам сүлжээ, тоног төхөөрөмжийн эвдрэл, гэмтлийг мэргэжлийн бус хүнээр засуулах;

2.7. чийдэн, дэнлүүг цаасаар бүрэх, цахилгаан утсан дээгүүр цаас, зурагт хуудас зэрэг бусад зүйл нааж халхлах, гэрэлтүүлгийн цахилгаан хэлхээнд зориулалтын бус утас залгаж хэрэглэх;

2.8. шатамхай материалтай орчинд хамгаалалтгүй гагнуур хийлгэх.

3. Ангийн ажлын байрны дотоод орчинд зориулалтын бус газар утаат тамхи татахыг хориглоно.

4. Барилгын зурагт тусгагдсаны дагуу барилга байшингийн коридор, үндсэн ба нөөц хаалга, шатны хонгилыг чөлөөтэй байлгана.

5. Гал түймэр унтраах анхан шатны багаж хэрэгслийг стандартын дагуу байрлуулж, гал түймэр унтраах дотор даралтат усан цэгийг нормд тусгагдсанаар, усан санг бүрэн бүтэн, үүрэг гүйцэтгэхэд байнга бэлэн байлгаж, тэдгээрийн байрлалыг тусгай тэмдгээр заана. Штаб, цэргийн байр, хадгалах байр, тавиулан, соёлын төв, эмнэлгийн байр, гал тогоо, дизель станц, засварын болон холбооны станцын байруудад гал түймэр унтраах зохих тооны багаж хэрэгслийн хамт тусад нь байрлуулна. Хүн тээврийн автомашин, автобус, шатахуун тээвэрлэгч, цэнэглэгч автомашиныг гал унтраагуураар хангана.

6. Ангийн байрлалтай ойр орших, гал түймэр унтраах, аврах ангийн утасны дугаарыг харилцах утас бүрийн дэргэд бичиж тавьсан байхаас гадна ангийн байрлалд гал түймрийн түгшүүрийн дуут дохионы хэрэгслийг төхөөрөмжилнө.

7. Гал түймрийн хяналтын эргүүл нь гал гарч болзошгүй бүх байрыг хаахаас өмнө тухай бүр шалгаж, илэрсэн зөрчил дутагдлыг арилгуулж, цахилгаан

халаагууруудыг салгаж, цахилгаан хэлхээг гадна талын залгуураар нь салгана. Цахилгаан эрчим хүч ашиглалтыг “Цахилгаан байгууламжийн дүрэм”-ийн дагуу гүйцэтгэж, хэвийн ажиллагааг байнга шалгаж, хяналт тавина.

8. Цэргийн анги, салбарт үйлдвэрлэл, үйлчилгээний онцлог нөхцөл байдлаас шалтгаалан гал түймрийн аюулаас урьдчилан сэргийлэх нэмэгдэл арга хэмжээг цэргийн ангид мөрдөх тусгай дүрмээр зохицуулна. Тусгай дүрмийг тухайн байгууллагын дарга ба ОБЕГ-ын даргын хамтарсан тушаалаар батална.

### **ТАВИУЛАН, ХАДГАЛАХ БАЙР, АНГАРЫГ ГАЛ ТҮЙМРИЙН АЮУЛААС ХАМГААЛАХ ТАЛААР АВЧ ХЭРЭГЖҮҮЛЭХ АРГА ХЭМЖЭЭ**

9. Зэвсэглэл, машин техник, нисэх онгоцыг гал, түймэр гарсан үед саадгүй гаргах зайтайгаар байрлуулна.

10. Тавиулан, хадгалах байр, ангарт гал түймэр гарахаас урьдчилан сэргийлэхийн тулд дор дурьдсан зүйлийг хориглоно:

10.1. машин техникийг зогсоол дээр шатахуунаар цэнэглэх,

10.2. түлшний сав, хоолой, гуурс нь гэмтэлтэй, шатахуун гоождог машин, нисэх онгоцыг хадгалалтад тавих;

10.3. шатахуун, тосолгооны материал, хоосон савыг машины зогсоолд хадгалах;

10.4. шатахуун ачсан машиныг тавиулан, ангарт оруулах, хадгалах;

10.5. гал түймрийн аюултай халаагуур хэрэглэх;

10.6. шатахуун хүлээн авах, олгох үед задгай гал түлэх, дэнлүү хэрэглэх, тамхи татах;

10.7. машин, техник тавьсан байранд гагнуурын ажил хийх;

10.8. онгоц дотор нисэх онгоцны хөдөлгүүр халаах, асаах;

10.9. машин техник, нисэх онгоц тавих, хадгалах байруудыг зориулалтын бусаар ашиглах;

11. техникийг шатахуунаар цэнэглэх үед задгай гал түлэх, дэнлүү хэрэглэх, гал гаргах, цахилгааны зөөврийн шугам ойртуулах;

12. Гал түймэр гарсан үед машин техник, нисэх онгоцыг татан гаргах бололцоог хангахын тулд тусгай чирэх хэрэгсэл бүхий жижүүрийн чирэгч, ажиллах бүрэлдэхүүнийг өдөр тутам томилно.

#### **Засварын газарт:**

13. Шатамхай шингэн /керосин, бензин, ацетон, спирт, г.м/ хэрэглэж ажил хийдэг болон хураагуур цэнэглэдэг байр нь салхивчтай байна. Цэнэглэх болон гагнуурын багаж, тоног төхөөрөмжийг тусгай байранд тавина.